

**PEMBERITAHUAN PERTANYAAN  
DEWAN RAKYAT, MALAYSIA**

PERTANYAAN : LISAN

TARIKH : 18 MAC 2014 (SELASA)

DARIPADA : Y.B NGA KOR MING [ TAIPING ]

**SOALAN :-**

**Y.B. NGA KOR MING [ TAIPING ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah rancangan dan jumlah peruntukan kerajaan untuk membangunkan 452 buah Kampung Baru dan kampung-kampung tradisional masing-masing di seluruh negara serta rancangan kementerian untuk meningkatkan pendapatan rakyat di kawasan tersebut.

## **JAWAPAN :-**

Tuan Yang di-Pertua,

Untuk makluman Ahli Yang Berhormat, dalam RMKe-10 Kerajaan telah memperuntukan sejumlah RM247 juta bagi pembangunan infrastruktur di 607 buah Kampung Baru di Semenanjung Malaysia. Selain daripada pembangunan infrastruktur, Kerajaan juga memperuntukan sejumlah RM100 juta sebagai pinjaman mudah untuk membantu penduduk kampung baru bagi memperbaharui pajakan tanah, menjalankan perniagaan kecil serta menaik taraf rumah. Pinjaman tersebut boleh digunakan oleh penduduk, antara lain untuk menambah pendapatan mereka dengan menjalankan perniagaan kecil. Bagi Kampung-Kampung Tradisional pula, tiada peruntukan khusus disediakan di bawah RMKe-10. Walau bagaimanapun, Kerajaan menyediakan peruntukan untuk membina kemudahan asas dan infrastruktur di bawah Program Projek-Projek Kecil dalam kawasan Pihak Berkuasa Tempatan (PBT).

Kementerian Kesejahteraan Bandar,  
Perumahan dan Kerajaan Tempatan

Mac 2014

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : UST. DATO' DR. MOHD. KHAIRUDDIN BIN AMAN  
RAZALI [ KUALA NERUS ]**

**TARIKH : 18 MAC 2014**

**SOALAN :**

**Ust. Dato' Dr. Mohd. Khairuddin bin Aman Razali [ Kuala Nerus ]  
minta MENTERI PERUSAHAAN PERLADANGAN DAN KOMODITI  
menyatakan kesan industri sawit di negara ini akibat daripada sentimen  
anti sawit yang dimanipulasikan oleh pihak-pihak tertentu.**

## **JAWAPAN:**

Tuan Yang Di-Pertua,

Untuk makluman Yang Berhormat, Badan-badan bukan Kerajaan (*Non Governmental Organisations* – NGOs) terutamanya di negara-negara Barat menerusi kempen anti sawit mereka telah memberi imej negatif terhadap industri sawit negara terutamanya dari sudut kemampuan industri ini. Pembangunan industri sawit seringkali dikaitkan dengan pelupusan kawasan hutan dan kemusnahan habitat hidupan liar. Selain itu, ada pihak-pihak tertentu yang mempersoalkan khasiat minyak sawit dari sudut kesihatan.

Kempen-kempen anti-sawit tersebut merupakan satu cabaran kepada industri sawit negara. Sehubungan dengan itu, Kerajaan telah mengambil langkah-langkah untuk mengikis tanggapan negatif kempen-kempen tersebut. Ini jelas dapat dilihat dengan peningkatan eksport produk-produk sawit negara. Umpamanya, pada tahun 2013, negara telah mengeksport 25.661 juta tan produk-produk sawit berbanding dengan 24.591 juta tan pada tahun 2012. Pasaran-pasaran produk sawit adalah negara China, Kesatuan Eropah, Pakistan, Amerika Syarikat dan India.

Sungguhpun demikian, Kementerian bersama-sama dengan agensi-agensi di bawahnya seperti Lembaga Minyak Sawit Malaysia (MPOB) dan Majlis Minyak Sawit Malaysia (MPOC) akan sentiasa terus mengambil pendekatan proaktif bagi menangani isu ini. Ini termasuk menganjurkan seminar, menerbitkan artikel dan dokumentari, mengadakan kerjasama dengan institusi-institusi penyelidikan terulung di negara-negara berkenaan dan mempelawa wartawan dari negara

berkenaan untuk melihat sendiri amalan kemampunan yang dilaksanakan oleh industri sawit negara. Usaha-usaha ini dijalankan secara berterusan untuk memberi tanggapan positif mengenai minyak sawit Malaysia kepada semua pihak berkepentingan.

Sekian, terima kasih.

**NO. SOALAN: 63**

**PEMBERITAHUAN PERTANYAAN BAGI JAWAB LISAN  
DEWAN RAKYAT**

**PERTANYAAN : JAWAB LISAN**

**DARIPADA : TUAN KHOO SOO SEANG [ TEBRAU ]**

**TARIKH : 18 MAC 2014**

**RUJUKAN : 6512**

**SOALAN:**

**TUAN KHOO SOO SEANG [ TEBRAU ]** minta **MENTERI DALAM NEGERI** menyatakan prosedur untuk mendaftarkan anak-anak warga Malaysia yang dilahirkan luar nikah.

**JAWAPAN:**

Tuan Yang di-Pertua,

Setiap kelahiran yang berlaku di Malaysia hendaklah didaftarkan di Jabatan Pendaftaran Negara (JPN). Dalam hal ini, JPN mendaftarkan kelahiran kanak-kanak di Malaysia mengikut peruntukan undang-undang seperti berikut:

- i. Akta Pendaftaran Kelahiran dan Kematian 1957 (Akta 299) bagi Semenanjung Malaysia;**
- ii. Ordinan Pendaftaran Kelahiran dan Kematian Bab 123 (No. 11 Tahun 1948) bagi Negeri Sabah; dan**
- iii. Ordinan Pendaftaran Kelahiran dan Kematian Bab 10 (No. 6 Tahun 1951) bagi Negeri Sarawak.**

Tafsiran anak yang dilahirkan luar nikah (anak tak sah taraf) merujuk kepada anak yang dilahirkan di luar perkahwinan ibu bapa iaitu apabila perkahwinan ibu bapa tidak didaftarkan di bawah undang-undang sivil bagi pasangan bukan beragama Islam ataupun perkahwinan ibu bapa tidak cukup tempoh 6 bulan qamariah semasa kelahiran anak bagi pasangan yang beragama Islam. Dalam hal ini, prosedur pendaftaran kelahiran anak luar nikah adalah sama seperti prosedur pendaftaran kelahiran biasa.

**Pertama sekali, pemaklum kelahiran perlu mengisi maklumat kelahiran kanak-kanak di dalam Borang Daftar Kelahiran dengan lengkap serta mengemukakan dokumen-dokumen yang diperlukan seperti berikut:**

- i. Dokumen kanak-kanak (asal dan salinan) iaitu Borang Pengesahan Kelahiran daripada hospital atau Surat Akuan Bidan/Doktor bagi kelahiran di rumah (asal), Kad Prnatal (Buku Rawatan Mengandung (asal dan salinan) dan Kad Kesihatan dan Imunisasi Kanak-Kanak (asal dan salinan);**
- ii. Dokumen ibu bapa (asal dan salinan) iaitu Kad Pengenalan atau Permit Masuk atau Pasport bagi ibu dan bapa kanak-kanak serta individu yang melaporkan kelahiran (asal dan salinan) dan Dokumen Perkahwinan atau Perceraian atau Sijil Kematian ibu dan bapa kanak-kanak (asal dan salinan); atau**
- iii. Dokumen pemaklum (asal dan salinan) iaitu Kad Pengenalan atau Permit Masuk atau Pasport.**

## PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : TUAN SU KEONG SIONG (IPOH TIMUR)

TARIKH : 18 MAC (SELASA)

SOALAN : ~~67~~ 64

Tuan Su Keong Siong minta **MENTERI KOMUNIKASI DAN MULTIMEDIA** menyatakan jumlah pendaftaran di bawah Personal Data Protection Act 2010 (PDPA) setelah tarikh penutup 15 Februari 2014. Nyatakan keberkesanan PDPA dalam pencegahan penyalahgunaan data peribadi oleh sesetengah pihak.

**JAWAPAN:**

Tuan Yang di-Pertua,

Untuk makluman Ahli Yang Berhormat, Akta Perlindungan Data Peribadi 2010 (Akta 709) telah dikuatkuasakan pada 15 November 2013. Setakat 15 Februari 2014, jumlah permohonan pendaftaran pengguna data yang telah diterima oleh Pesuruhjaya Perlindungan Data Peribadi adalah sebanyak 8449 permohonan. Keberkesanan Akta belum dapat dinilai sepenuhnya lagi memandangkan ianya baru sahaja dikuatkuasakan.

**PEMBERITAHU PERTANYAAN DEWAN RAKYAT**

**PERTANYAAN** : **LISAN**  
**DARIPADA** : **Y.B. Dato' Henry Sum Agong [ Lawas ]**  
**TARIKH** : **18.03.2014**  
**SOALAN** :

**Y.B. Dato' Henry Sum Agong [ Lawas ]** minta **MENTERI PENDIDIKAN** menyatakan sama ada Kementerian akan melaksanakan '*School-Based Assessment System*' (PBS) di kalangan murid-murid Tahun 6 mulai tahun 2014.

**JAWAPAN**

Tuan Yang di-Pertua,

Pelaksanaan Pentaksiran Berasaskan Sekolah (PBS) bermula di Tahun 1 Sekolah Rendah, pada tahun 2011 dan Tingkatan 1, Sekolah Menengah pada tahun 2012. Walaupun pelaksanaannya belum lengkap satu kitaran, dapatan lawatan pemantauan dan kajian impak PBS pada 2012 menunjukkan bahawa guru lebih kreatif dalam pengajaran, pembelajaran dan pentaksiran kerana tiada lagi tekanan peperiksaan. Murid didapati lebih aktif dan kreatif selain daripada pembelajaran yang lebih seimbang kerana tidak lagi hanya berfokus terhadap pencapaian akademik semata-mata.

Walau bagaimanapun, KPM telah mengambil inisiatif meneliti semula pelaksanaan PBS dengan membuat kajian semula PBS mulai Februari 2014 dan pengumuman telah dibuat oleh YAB Menteri Pendidikan pada 18 Mac 2014.

Antara penambahbaikan adalah Dokumen Standard Prestasi (DSP) dipermudahkan; guru tidak perlu lagi menyediakan Fail Perkembangan Murid (FPM) dan melengkapkan Rekod Transit; dan guru boleh merekodkan perkembangan pembelajaran murid secara *offline*.

Rjm38